

scribunt in illas barbaricas interpretationes, quae tunc editae sunt (meliores enim habere non poterat) & in tabularum constructionem contulisse, quadringenta millia aureorum. Hanc liberalitatem in re tam pulchra, & utili, miramur, & magnitudinem sumptuum predicamus, cum his proximis annis compertum sit, non Reges, sed multos Principes, quorum opes non sunt pares Alphonsino regno maiorem pecuniam effudisse in edificationibus inutilibus. Celebrata est & Alexandri liberalitas, quod octingenta talenta Aristoteli dederit ad inquisitionem naturae animalium, videlicet Quadringenta millia, & octingenta millia coronatorum. Voluntatem horum Regum & virtutem probo, sumptus non sunt magni: quanto plus enim effudit Alexander in funus Ephestionis? Sed omitto hanc commemorationem.

Instruxit Deus gubernatores facultatibus, quarum pars aliqua conseruationi Religionis, & artium debetur, idque ita ordinauit vetustas, sed propter varias vitae confusiones, honesta instituta veterum subinde mutata sunt, & mutabuntur. Interea tamen sapientes & boni Principes cum sciant pietatem Deo gratam esse, opem ferre studijs religionis & artium, non sinant prorsus deleri doctrinam vitae necessariam, cogitent ideo se in hoc fastigium diuinitus collocatos esse, ut praecipue sint custodes rerum diuinarum, verae sapientiae, iusticiae, & pacis. Has res cum & intelligunt & tuentur, imagines sunt Dei inter homines, qui haec summa bona vult intelligi, & coli, ut ipsum agnoscamus qualis sit, & ut nostrae mentes cum diuina quantum fieri potest congruant. Haec te ipsum Princeps ALBERTE saepe cogitare non dubito praesertim in hac senecta maturitate, maximeque & optare & anniti, ut ad posteros transmittatur doctrina de Deo integra, & de artibus, quae & Ecclesiae & vitae necessariae sunt, quae in re ut gubernet te filius Dei, Dominus noster Iesus Christus, & te diu seruet incolumem, & tibi haeredes donet, qui & virtute patrum referant, & ornatam à te patriam feliciter gubernent, veris cum gemitibus & votis oro. Bene & feliciter valeat celsitudo tua. Anno Christi 1551. die 18 Iulij, qui dies C. Caesaris seculo insignis fuit exortu caniculae in Alexandrino Horizonte, ad cuius stellae exortum Aegyptij olim annum suum magnum accommodarunt, cum alioqui equinoxia & solstitia certis diebus mensium nequaquam essent adfixa, sed porro vagerentur per singulos totius anni dies intra annos 1460. Iulianos.

*

PERI